

# Il premi d'art Manor Cuira 2019 vegn surdà ad Andriu Deplazes

■ (cp) **Andriu Deplazes (\*1993)** vegn undrà cun il premi d'art Manor Cuira 2019 ch'è dotà cun 15 000 francs. Il premi d'art Manor è in dals premis da promoziun ils pli impurtants per la lavur artistica contemporanea en Svizra. Exponidas vegnan las lavurs dad *Andriu Deplazes* l'atun 2019 en in'exposiziun individuala en il Museum d'art dal Grischun a Cuira.

Malgrà che la pictura vegn declarada regularmain sco morta dapi var 50 onns resta ella in punct fix da l'art figurativ. Deplazes lavura en moda classica cun quest medium. El fa maletgs figurativs en ieli sin tailla da glin. Ils maletgs expressivs èn plain tuns da colurs psichedelicas. Deplazes construescha in mund surreal, ses motivs èn l'uman e la natira. Las figuras da Deplazes han proporziuns bizaras e sa mussan quasi adina nivas. Ellas èn simpels corps senza chavels, che na possedan betg cleras caracteristicas sexualas. La natira sco tala picturada en furma da deserts, da cuntradas da palì u da gauds selvadis che traguttan tut sa preschenta da maniera refusanta. La civilisaziun, la tecnica u la cultura mancan complettamain. Il foss tranter l'uman e la natira è dominant. Er sche las creatiras cumparan savens en duas sin ils maletgs, fan ellas ina impressiun trista, isolada e persa en quests conturns. L'alienaziun, la mort e l'apocalipsa èn pli preschentats ch'il paradìs, schebain ch'ìls maletgs giogan sin l'emprima eglia da cun questa iconografia. Insumma cite-scha Deplazes en ses maletgs l'istorgia d'art e cumpona ils maletgs en simmetrias e posas che sa basan sin maletgs classicis enconuschents. Uschia sa serra il circol tranter il medium vegl e ses access contemporan. L'occupaziun cun la colur sco material influenzescha la composiziun dals maletgs, e l'element evident narrativ dals maletgs svanescha la finala



Premi d'art Manor va ad Andriu Deplazes.

en l'aivradad da colurs ardentas. I vegnan creads maletgs d'umans en la natira che fan surstar pervia da l'artificialità e pervia da l'alienaziun cumpletta.

Il premi d'art Manor Cuira è collià cun in'exposiziun individuala en il Museum d'art dal Grischun Cuira e cun la publicaziun d'in cudesch. Il premi vegn surdà en il rom da la vernissascha l'atun 2019.

## In engaschament per la giuvna scena d'art en Svizra

Il premi d'art Manor, in dals premis da promoziun ils pli impurtants per la lavur artistica contemporanea en noss pajais, è vegnì stgaffì l'onn 1982 da Philippe Nordmann per porscher ina plattform ad artistas giuvnas ed artists giuvens da la Svizra. El vegn surdà minga onn d'ina giuria d'expertas e d'experts. In sguard sin la glista da las persunas premiadas da Cuira mussa ch'il premi d'art Manor ha gidà in'entira retscha d'artistas ed artists a tschiffar pe sin

plau internaziunal, sco per exempel *Gaudenz Signorell* (premi d'art 1990), *Hans Danuser* (premi d'art 1992), *Zilla Leutenegger* (premi d'art 2004) u il duo artistic *Gabriela Gerber e Lukas Bardill* (premi d'art 2006).

## Andriu Deplazes

Andriu Deplazes (\*1993), viva e lavura a Turitg ed a Brüssel. L'onn 2016 ha el fatg il bachelor en l'art figurativ tar *Thomas Müllenbach* a la Scola auta dals arts da Turitg. Avant ha el absolvì il curs propedeutic a la scola da musica dal Conservatori da Turitg nua ch'el ha sunà la clarinetta classica. L'onn 2017 ha el survegnì il premi d'art Helvetia e l'onn 2018 ha el preschentà sias ovras en il rom da l'exposiziun «Caravan» en la Chasa d'art da l'Argovia. L'onn 2019 survegn el il premi d'art Manor Cuira.